



Claude WISELER
President vun der
Chamber vun den Deputéierten
19, um Krautmaat
L-1728 Lëtzebuerg

Lëtzebuerg, den 30/10/2025

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un d'Ministère fir Héichschoul a Fuerschung & Mobilitéit an Ëffentlech Aarbechten weiderzeleeden.

Zanter dem 22. September gëtt et um Campus vun der Universitéit Lëtzebuerg (Uni.lu) um Kierchbiereg eng massiv Aschränkung am Service vun de Studentekantinen. Laut engem Mail vum "Facility Management Department" vum 18. September 2025 gouf dës Decisioun wéinst "circumstances beyond our control" geholl. Konkret huet dës Restriktioun dozou gefouert, datt d'Kantin "Altius" nëmme ronn 149 Molzechte pro Dag zerwéiere kann, wouduerch si dacks scho virun 12 Auer zoumécht. Dëst huet zur Folleg, datt méi wéi d'Hallschent vun de Studente vum Service ausgeschloss sinn.

Déi studentesch Delegatioun huet de 14. Oktober am Universitätsrot e Mangel un Transparenz a konkrete Léisungen ugeschwat. An engem Follow-up Mail vum 20. Oktober 2025 huet den "Facility Management Department" matgedeelt, zesumme mam Ministère an dem Operateur Restopolis u Léisunge schaffen. Informatiounen no wier d'Wuerzel vum Problem eng zanter Jore bekannt Ënnerdimensionéierung vun de Kicheninfrastrukture vis-à-vis vun der Zuel u Studente, woubäi d'Uni d'Verantwortung bei der Administration des bâtiments publics (ABP) gesäit. Eng qualitativ an zougänglech Kantin ass awer en zentrale Pilier fir de Wuelbefanne vun de Studenten an d'Bekämpfung vun der Studenteprekaritéit.

An deem Zesammenhang wéilt ech de Ministeren dës Froe stellen:

1. Wat ass déi exakt technesch Ursaach fir d'Aschränkung vum Restopolis-Service op dem Campus Kierchbiereg, déi d'Uni mat "circumstances beyond our control" beschriwwen huet?
2. Stëmmt et, datt d'aktuell Situatioun op eng zanter Jore bekannt Ënnerdimensionéierung vun de



Kicheninfrastrukture vis-à-vis vun der Zuel u Studenten zeréckzeféieren ass, a wa jo, firwat gouf dëse Problem net antizipéiert a behuewen?

3. Wéi gesäit de konkreten Zäitplang fir eng vollwäerteg Restauratioun vum Service um Campus Kierchbierg aus, a wéini kann erwaart ginn, datt nees all Student do Mëttegiessen iesse kann?
4. Wéini gouf d'Administration des bâtiments publics (ABP) iwwer de Problem vum Facility Management Department vun der Uni Lëtzebuerg informéiert, a wat sinn d'Ursaache fir déi eventuell Verspéidunge bei enger Léisung, wann se bei der ABP leien?
5. Wéini wäert d'Bezuelung mat elektronesch Moolzecheschäiner (Pluxee Kaart) an de Studentekantinen nees méiglech sinn?
6. Ass de Ministère iwwer d'Reklamatiounen iwwer eng degradéiert Qualitéit vun de Molzechten informéiert, a wéi gëtt dëse Problem verfollegt?

Mat déiwem Respekt,



CLEMENT Sven
Deputéierten





Gemeinsam Äntwert vun der Madamm Ministesch fir Fuerschung an Héichschoul, vun der Madamm Ministesch fir Mobilitéit an ëffentlech Aarbechten a vum Här Minister fir Educatioun, Kanner a Jugend op d'parlamentaresch Fro Nr. 3138 vum 30. Oktober 2025 vum honorabelen Deputéierte Sven Clement

1. Wat ass déi exakt techesch Ursaach fir d'Aschränkung vum Restopolis-Service op dem Campus Kierchbierg, déi d'Uni mat "circumstances beyond our control" beschriwwen huet?

Restopolis ass eng staatlech Verwaltung, déi fir d'Bedreiwe vun de Kantine vun eise Lycéeën an der Universitéit zoustänneg ass. Dëst geschitt an den Infrastrukturen, déi Restopolis vun den zoustännegen staatlechen Verwaltungen zur Verfügung gestallt kritt nodems de Programme de construction vum Occupant mat sengem Ministär de tutelle erstallt gouf.

De Service de restauration muss am Respekt vun den applikabelen autoriséierte Kapazitéiten bedriwwen ginn.

2. Stëmmt et, datt d'aktuell Situatioun op eng zanter Jore bekannt Ënnerdimensiounéierung vun de Kicheninfrastrukture vis-à-vis vun der Zuel u Studenten zeréckzeféieren ass, a wa jo, firwat gouf dëse Problem net antizipéiert a behuewen?

Effektiv ass d'Unzuel vun de Studenten, déi an der Universitéit iessen, an de leschte Jore staark geklommen.

Betreffend den Campus Kierchbierg, gouf d'Kapazitéit am Joer 2018 temporär op 158 Plazen erhéicht, fir d'Studente vum Lycée technique du Centre um Kierchbierg opzehuelen während där Zäit, wou hir Kantine renovéiert gouf. Et gouf keng permanent Extensioun geplangt. De Projet vum neie Campus Kierchbierg wäert eng laangfristeg Léisung fir dës Besoinen ubidden.

3. Wéi gesäit de konkreten Zäitplang fir eng vollwäerteg Restauratioun vum Service um Campus Kierchbierg aus, a wéini kann erwaart ginn, datt nees all Student do Mëttegiessen iesse kann?

A ce stade ass de Ministère fir Fuerschung an Héichschoul amgaang, mat der Universitéit, d'Besoinen fir déi nächst fënnef Joer ze definéieren, op Basis vun deenen déi noutwendeg Aarbechte kënnen definéiert ginn an de Commodo vum Restaurant "Altius" aktualiséiert ka ginn.

En attendant dass eng definitiv Léisung en Place ass liwwert Restopolis déi zousätzlech Molzechten vun anere Plazen aus, am Respekt vun den Normen vun der Liewensméttelsécherheet.

4. Wéini gouf d'Administration des bâtiments publics (ABP) iwwer de Problem vum Facility Management Department vun der Uni Lëtzebuerg informéiert, a wat sinn d'Ursaachen fir déi eventuell Verspéidung bei enger Léisung, wann se bei der ABP leien?

An deem Kontext ass virop ze präziséieren, dass am Joer 2017 den deemolegen Héichschoulminister Restopolis offiziell beoptraagt huet fir d'Gestioun vum Universitätsrestaurant um Campus Kierchbierg ze iwwerhuelen. D'Administration des bâtiments publics gouf den 20. Februar 2017



diesbezüglech vum Ministère fir Educatioun, Kanner a Jugend per Courrier informéiert. Am Dezember 2017 huet Restopolis eng éischt Kéier eng Demande bei ABP gemaach fir d'Kicheninfrastruktur unzepassen fir den Ufuerderungen un lessen vun de Studenten gerecht ze ginn. Op dës Demande hin vu Restopolis goufen deemools vun ABP déi gefroten Adaptatiounen gemaach. Am Dezember 2024 huet de Ministère fir Educatioun, Kanner a Jugend de Ministère fir Mobilitéit an ëffentlech Aarbechte mat der Fro saiséiert, ob d'Produktiounsunitéit vum Restaurant "Altius" kéint renovéiert ginn, notamment fir och d'Kapazitéit vun der Produktioun ze erhéijen. Fir eventuell weider Investissementer op deem Site ze justifizéieren ass et awer indispensable, dass de Ministère fir Fuerschung an Héichschoul, e konkrete Programm opstellt an d'Entwécklung an d'Besoinen fir déi nächst fënnef Joer definéiert, op Basis vun deem déi noutwendeg Aarbechte kënnen definéiert an de Commodo vum Restaurant Altius aktualiséiert ka ginn.

Déi baulech an technesch Upassunge vum Restaurant Altius sinn duerno vun der Verwaltung fir ëffentlech Bauten duerchzeféieren.

5. Wéini wäert d'Bezuelung mat elektronesch Molzecheschäiner (PI5uxee Kaart) an de Studentekantinen nees méiglech sinn?

D'Bezuele mat elektronesch Molzecheschäiner ass an de Kantine vu Restopolis net virgesinn.

Geméiss dem groussherzogleche Règlement vum 29. Dezember 1986, dat d'Ausféierung vum Artikel 115, Punkt 21, vum Gesetz iwwer d'Akommessteier reegelt, gëllt d'Steierbefreiung nëmme fir d'Molzecheschäiner vun Employeuren, déi keng Kantine zur Verfügung hunn.

Zousätzlech bezuelen d'Studenten an d'Mataarbechter vun der Universitéit an de Kantine vu Restopolis ee vum Staat subventionéierte Präis. Aus deem Grond gëllt Restopolis net als Restaurateur am Sënn vum Artikel 2 vum genannte groussherzogleche Règlement.

6. Ass de Ministère iwwer d'Reklamatiounen iwwer eng degradéiert Qualitéit vun de Molzechten informéiert, a wéi gëtt dës Problem verfollegt?

Restopolis leien aktuell keng Reklamatiounen iwwer d'Qualitéit vun de Molzechten um Campus Kierchbierg vir. D'Universitéit huet och keng Reklamatiounen iwwer d'Qualitéit vun de Molzechten an der Kantine, krut, an deemstspriechend ass och keng Informatioun un de Ministère fir Fuerschung an Héichschoul gaangen.

Lëtzebuerg, den 2. Dezember 2025

D'Ministesch fir Fuerschung an Héichschoul

(s.) Stéphanie OBERTIN